

मार्निंग डोगरी न्यूज़ बुलेटिन, समे. **09-20** Hrs

<><><><><><>

Headlines

- जम्मू-कश्मीर विधानसभा दा बजट इजलास अज्जै थमां शुरु होआ करदा ऐ। सभ्मनें प्रबंधें गी मुक्कदा रूप देई दित्ता गेदा ऐ। एलजी मनोज सिन्हा होर सभ्मनें शा पैहले सदन गी सम्बोधन करडन।
- जम्मू-कश्मीर विधानसभा दे स्पीकर अब्दुल रहीम राथर होर अज्ज बजट इजलास लेई अध्यक्षें दे पैनल लेई नाएं दा ऐलान करडन।
- बन्ने आहले जिले पुंछ च, त्रै आतंकवादिएं दिएं संपत्तिएं गी अटैच कीता गेआ ऐ। एह् सभ्मै आतंकवादी, नस्सियै पाकिस्तान दे नजैज कब्जे आहले कश्मीर च चली गेदे न।
- आईसीसी चैंपियंस ट्रॉफी दे कल दुबई च खेड्डे गेदे मुकाबले च भारत नै न्यूजीलैंड गी 44एं द्रौडें कन्नै हराई दित्ता। भारत दा मुकाबला हून कल दुबई च पैहले सेमीफाइनल च अस्ट्रेलिया कन्नै होग।
- मौसम विभाग नै अज्ज जम्मू-कश्मीर च हौली थमां दरम्याने दर्जे दी बरखा बरने ते उच्चे प्हाड़े इलाकें पर बर्फबारी दी पेशगोई कीती ऐ। जम्मू-श्रीनगर राश्ट्री जरनैली सिडक पर हौली जात्तरी गडिडएं दी दौने बक्खी दा आओजाई होआ'रदी ऐ।

<><><><><><>

J&K Budget

जम्मू कश्मीर विधानसभा दे बजट सत्र लेई सारियां तैआरियां करी लैती गेदियां न। इस दरान बजट सनें होर केई महत्वै आले मामलें पर चर्चा होग। एह् सत्र केन्द्र शासत प्रदेश लेई बड़ा महत्वै आला मन्नेआ जा'रदा ऐ। इस सत्र दे हंगामेदार रौहने दी बी मेद ऐ की जे विरोधी पार्टिं सरकार गी बक्ख-बक्ख मुद्दे पर घेरने दी तैआरी कीती दी ऐ।

<><><><><><>

Speaker Panel

जम्मू-कश्मीर विधानसभा दे स्पीकर अब्दुल रहीम राथर होर अज्ज बजट इजलास दी शुरुआत दे मौके पर लेफ्टिनेंट गवर्नर मनोज सिन्हा हुंदे उद्घाटनी सम्बोधन दे मगरा अज्ज अध्यक्षें दे पैनल लेई सदस्यें दे नाएं दा ऐलान करडन।

एह पैनल, सदन दे कम्मकाज च स्पीकर हुंदे सैहयोग करने च बड़ी महत्वै आहली भूमिका निभांदा ऐ। इस पैनल दे सदस्ये पर, स्पीकर हुंदी गैर-मजूदगी च विधानसभा इजलास दी अध्यक्षता करने दी जिम्मेदारी सने, बवस्था बनाई रखने, संसदी प्रक्रियाएं दी पालमा जकीनी बनाने ते विधानसभा दे बवस्थित ढंगै सिर कम्मकाज गी चलाने दी जिम्मेदारी बी हुंदे ऐ। अध्यक्षे दे पैनल लेई सदस्ये दे नाएं दा ऐलान करने मगरा स्पीकर होर ओकड़ी हस्तिएं गी श्रद्धांजलि देडन जिंदा पिच्छले किश अरसे दरान काल होई गोआ ऐ। ओह साबका प्रधानमंत्री डाक्टर मनमोहन सिंह ते साबका मंत्री सैय्यद गुलाम हुसैन हुंदे सने होरनें हस्तिएं गी बी श्रद्धांजलि अर्पित करडन।

<><><><><><>

Party Meeting

केन्द्र शासत प्रदेश दे पैहले बजट सत्र थमां पैहले मुख्यमंत्री उमर अब्दुल्ला होरें भ्याल पार्टिं दी इक सांझी बैठक दी अध्यक्षता कीती। इस दरान सदन दे सुचारु कम्मकाजे पर चर्चा कीती गई। बैठक च कांग्रेस पार्टी दे नेता जी.ए.मीर ते सीपीआई(एम) दे विधायक एम.वाई.तारीगामी बी शामिल न। एह सांझी बैठक नेशनल कांफ्रेंस आस्सेआ बक्खरे-बक्खरे तौर पर लाई गेदी बैठक दे मगरा लग्गी। तोआई विधानसभा च विपक्षी दल दे नेता सुनील शर्मा होरें उपराज्यपाल मनोज सिन्हा हुंदे कन्नै मलाटी कीती ते विधानसभा दे अज्जै थमां शुरू होआरदे बजट सत्र मतल्लक केई सारे मामले पर चर्चा कीती।

<><><><><><>

IT Inspeccion LA

बजट सत्र दे शुरू होने थमां पैहले इनफरमेशन टेक्नालोजी मैहकमे दे आयुक्त सचिव सोरभ भगत होरें जम्मू आले विधानसभा परिसर दा दौरा लाया ते इंटरनेट सरबन्धी ढांचे दा जायजा लैता। उनें प्रमुख थाहरें जियां असेंबली हॉल, मीडिया लेई थाहरें ते होर दुइएं तगहें पर इंटरनेट दी सुविधा, बेहतर ढंगै सिर उपलब्ध करोआने पर जोर पाया। उनें आईटी सरबन्धी ढांचे गी मजबूत करने लेई गलाया तां जे विधानसभा दी कारवाई बेहतर ढंगै सिर चली सकै। एह जतन दर्शादा ऐ जे सरकार विधानसभा सरबन्धी कारवाईएं गी बेहतर, कारगर ते तकनीक आधारित ढंगै सिर करोआने लेई वचनबद्ध ऐं

<><><><><><>

JKSCERT

जेके SCERT दे जम्मू आहले डिजीजनल दफतर आसेआ समग्र शिक्षा दी दिशा च इक बड्डी गैह पुट्टदे होई शिक्षा ते सिखलाई सरबन्धी जिला संस्थान – डाईट दे सैहयोग कन्नै जम्मू जिले दे अध्यापके, मास्टरे ते लैक्चरारे लेई निष्ठा अभियान दे तैहत् 5एं दिनें दे सिखलाई कार्यक्रम दा सरिस्ता कीता गोआ ऐ।

शिक्षा विभाग दे अतिरिक्त मुख सचिव शांतमनु होरें इस कार्यक्रम दा उद्घाटन कीता ते एहदा मकसद शिक्षकें गी ओकड़े गुर सखाना ऐ जेहदे राहें ओह अगगे समग्र शिक्षा आहले म्हौल गी होर बेहतर बनाई सकन। इस दरान लोआए गेदे विशेष सत्रें च दिव्यांग बच्चें गी पढ़ाने ज्नेय विशें पर मता ध्यान केन्द्रित कीता गेआ। 5एं दिनें दे इस कार्यक्रम दा उद्देश्य राष्ट्री शिक्षा नीति 2020 दे मूजब शिक्षकें गी सशक्त बनाना ऐ तांजे ओह बच्चें दे हुनर च बी मता बाददा करी सकन।

<><><><><><>

Properties Attached

जम्मू कश्मीर पुलस आस्सेआ कल पुंछ जिले च त्रै आतंकवादिएं दी 14 कनाल 8 मरले दी जमीन गी अटैच कीता गेआ। एहदी कीमत 28 लक्ख रपे थमां बद्ध दस्सी जा'रदी ऐ। एह जमीन कब्जा रेखा कन्नै लगदे कासबा ते किरनी ग्रां दे मकामी आतंकवादिएं दी ऐ जेहड़े पाकिस्तान दे नजैज कबजे आले कश्मीर नस्सी गेदे न। एह कारवाई बन्ने पारा थमां प्रायोजित आतंकवाद खत्म करने ते आतंकवादिएं गी थोने आली मदद सरबन्धी पूरे पराते सरिस्ते गी नष्ट करने तैहत् कीती गई ऐ। प्रशासन आस्सेआ लगातार जतन कीते जा'रदे न, खित्ते च आतंकवाद दी चुनौतिएं गी घट्ट करने ते आतंकवादिएं गी थोने आली माली इमदाद गी खत्म करने आस्तै।

<><><><><><>

Livestock Ramban

पशु पालन मैहकमा रामबन आस्सेआ जतन कीते जा'रदे न जे दुध दी पैदावार बधाई जाई सकै ते पशुधन कन्नै जुड़े दे करसानें लेई एह कम्म लाहकारी होई सकै। एहदे लेई केई सारे जतन रंभे जा'रदे न। इंदे तैहत् गै इक जतन ऐ सैटेलाइट फार्म कायम कीना। बच्छिएं दी सेई चाल्ली दिक्खभाल लेई 400 नेइयां इकाइयां कायम कीतियां जांगन। एहदा मकसद दुध दी पैदावार गी बधाना ते बेहतर नसल तैआर करना ऐ। जम्मू कश्मीर प्रशासन आस्सेआ मंजूरशुदा इस जतन तैहत् करसानें गी लाह होग ते खित्ते दा आर्थिक विकास होग। होर जानकारी दिंदे होई मुख पशुपालन अधिकारी डॉ. सुहेल कवूसा होरें आखेआ.....

<><><><><><>

ICC Champions

आईसीसी चैंपियंस ट्राफी क्रिकेट टूर्नामेंट च कल दुबई च खेड़दे गेदे मुकाबले च भारत नै न्यूजीलैंड गी 44एं रंजे कन्नै हराई दित्ता। इस जित्त दे बाद हून भारत दा मुकाबला कल पैहले सेमीफाइनल च अस्ट्रेलिया दे कन्नै होग।

भारत नै पैहले बल्लेबाज करदे होई 9 विकेटें दे नुकसान पर 2 सौ नुंजा रंज बनाइयां। इस जित्त दे कन्नै भारती टीम ग्रुप-ए च सब्भनें शा उप्पर होई गई ऐ ते हून कल दुबई च ओहदा मुकाबला पैहले सेमीफाईनल च अस्ट्रेलिया दे कन्नै होग। तोआई न्यूजीलैंड दा मुकाबला औंदे बुधवारें दुए सेमीफाईनल च दक्खन अफ्रीका कन्नै होग।

<><><><><><>

Weather / Highway

मौसम विभाग नै अज्ज जम्मू-कश्मीर च हौली थमां दरम्याने दर्जे दी बरखा बरने ते उच्चे प्हाड़े इलाकें पर बर्फबारी दी पेशगोई कीती दी ऐ। विभाग नै इब्बी भविष्यवाणी कीती ऐ जे कल 4 मार्च थमां लेइयै 9 मार्च तोहड़ी मौसम आमतौरा पर खुशक रौहग ते ओहदे परैन्त 10 मार्च थमां लेइयै 13 मार्च तोहड़ी फही बरखा ते बर्फबारी दे असार न। ऊआं जम्मू-श्रीनगर राश्ट्री जरनैली सिड़क फिलहाल गडिडएं दी आओजाई लेई खुल्ली दी ऐ ते हौली मोटर गडिडएं गी दौनें बक्खी दा आओजाई दी खुल्ल दित्ती गेदी ऐ। सिड़कै दी स्थिति दा जायजा लैने परैन्त गै भारी मोटर गडिडएं गी नवयुग सुरंग थमां जम्मू बक्खी औने दी इजाजत दित्ती जाहग। लोकें गी एह गुजारिश बी कीती गई ऐ जे ओह पूरे अनुशासन कन्नै अपनी अपनी लेन च गै गड्डी चलान ते दिनै बेल्ले गै सफर करन।

<><><><><><>